

Tata condena pa abusa sexualmente di su yiu menor di edad

UN caso sumamente tristo Corte den Prome Instancia a atende diabierna ultimo caminda e acusado, J.V.P. di 52 aña, a presenta dilanti di Hues pa defende su mes cu e acusacion serio cu el a abusa sexualmente su propio yiu muhe di 13 aña. E violacion aki a tuma luga na 2022 y a dura dos aña ora cu e hobencita di 15 aña, a dicidi cu su persona no por sigui acepta loke su tata tabata haci cu su persona y acerca su mentor di su scol, kende a dicidi di yuda e hoben y hunto cu e mama di esaki, a entrega keho na autoridadnan policial.

E acusado pa colmo ta tata di 12 yiu y ta trahando aki na Aruba sin permiso di estadia y tampoco di labor pero na 2022 el a cuminsa ‘basila’ su yiu victima di 13 aña, entre otro contando e mucha cu tal y tal hende, ta drumi cu su yiu muhe y purbando na convence e victima cu esaki ta algo normal. Despues el a hasta duna e yiu muhe un pelicula pornografico pa e mira tur esaki den su intento pa convence e pover criatura cu tene relacion cu su tata, no ta algo malo pero e yiu no a duna aden.

E tata a sigui acerca e mucha y net prome cu el a cumpli 14 aña, el a trata di convence su yiu dor di bis’e cu e no mester pensa cu su persona ta su tata y asina a sigui y e acusado a cuminsa lanta e mucha pa bin drumi cu’ne riba su cama, ora cu e mama sali bay trabou pa 4’or di marduga.

Segun declaracion di e victima, a mostra cu dado momento e tata a subi drumi riba dje y el a laga e tata haci actonan sexual cu su persona pero sin cu el a reacciona of a participa den e cosnan aki.

E tipo di ‘incidente’ aki e criatura inocente aki mester a soportar pa dos aña largo caminda aña pasa el a dicidi di acerca su mentor pa asina haya un hende pa alivia su mes cu e problema cu tabata birando algo insoportabel pa su persona.

Diabierna mainta e caso no a bira un discusion of hasta un confrontacion legal dilanti Hues ya cu e acusado Peña a admiti na Hues cu loke e mucha a declara na autoridadnan policial, ta berdad y na dado momento el a bisa cu e ta arepentí di loke el a haci y cu awor e ta arepentí di loke el a haci cu su propio yiu. Fiscal a ripiti e acusacionnan contra di e acusado J. V. must-rando cu esakinan ta acusacionnan concreto y legal y cu mirando seriedad di e caso e ta pidi Hues pa duna e acusado cinco aña di prizon pa loke el a haci cu e yiu muhe.

Contrario na otro casonan di violacion di menor di edad, Hues no a haya necesidad pa bay studia e caso aki, principalmente pa e hecho cu e tata acusado mes a admiti di e viola su yiu muhe y bay over mesora na sentencia J. V. P., igual cu peticion di Fiscal, esta na cinco aña di prizon.

Na mes momento a avisa e acusado cu e tin dos siman pa apela e decision di Corte pero mirando el a admiti tur acusacion den su contra, ta dificil pa e acusado por tin e posibilidad cu e lo ricibi reduccion di sentencia, al contrario mirando tur loke a bin dilanti, e probabilidad ta mas grandi cu e por mas bien ricibi aumento di su castigo den caso di apelacion. Loke tambe a acapara hopi atencion diabierna durante tratamento di e caso aki, ta e hecho cu e criatura cu a pasa den e abuso a mostra di ta stima su tata y e no kier algo malo pasa cu’ne.

e Poder den Mi

MENSAHE DI DIA

**No pidi permiso pa bula.
E HALANAN TA DI BO.
Y e cielo no ta di
NINGUN HENDE.**

4 FEBRUARI 2025

  e Poder den Mi